

HUGHES, JOHN WILLIAMS (1888-1979), gweinidog (Bed.) a Phrifathro coleg

Enw: John Williams Hughes

Dyddiad geni: 1888

Dyddiad marw: 1979

Rhyw: Gwryw

Galwedigaeth: gweinidog (Bed.) a Phrifathro coleg

Maes gweithgaredd: Crefydd; Addysg

Awdur: D. Hugh Matthews

Ganed John Williams Hughes ar 6 Ionawr 1888 ym Mrynhyfryd, Abertawe. Mab ydoedd i Jeremiah Lot Hughes, diacon, trysorydd ac ysgrifennydd gohebol Dinas Noddfa, Glandwr, eglwys y Bedyddwyr Cymraeg ar gyrion y dref. Roedd ei fam yn un o bedair merch yr enwog **Barchg John Williams**, gweinidog Aberduar, Llanybydder, '**Ioan ap Ioan**', 1800-1871. Fe'i haddysgwyd yn ysgol gynradd Brynhyfryd cyn iddo fynd ymlaen i Ysgol Ramadeg Abertawe. Derbyniwyd ef yn fyfyrwr diwinyddol yng Ngholeg y Bedyddwyr, Bangor, yn 1905. Graddiodd yng Ngholeg y Brifysgol Bangor yn y celfyddydau ac mewn diwinyddiaeth cyn symud i Rydychen yn 1911 i barhau ei addysg ddiwinyddol yng Ngholeg Mansfield a Choleg Iesu. Graddiodd yno eto ac yn 1914 ordeiniwyd ef yn weinidog eglwys y Bedyddwyr Saesneg yn Dagnall Street, St Albans. Fliwyddyn yn ddiweddarach, yn 1915, priododd â Margaret Evans, merch i'r Parchg Edward Evans, gweinidog Penuel, Bangor. Bu iddynt dri o fechgyn, Ieuan, Edward a David (sef yr actor Hugh David).

Torrodd ei ieched yn 1918 a bu'n rhaid iddo gefnu ar St Alban's a'r weinidogaeth fugeiliol. Dychwelodd i fyw i dyddyn ger y Bermo yn Sir Feirionnydd lle bu'n cadw ieir, ond erbyn 1920 roedd ei ieched wedi gwella digon iddo fedru dechrau pregethu eto a bwrw golwg dros eglwys fach y Bedyddwyr yn y Bermo. Derbyniodd alwad i fod yn weinidog eglwys Saesneg y Bedyddwyr yn Alfred Place, Aberystwyth, yn 1924 a dwy flynedd yn ddiweddarach derbyniodd alwad i gyd-weinidogaethu â'r hynafgwr, **Parchg Charles Davies**, yn y Tabernacl, Caerdydd. Yn 1936, wedi deng mlynedd yn y Tabernacl, derbyniodd alwad i fod Athro Groeg ac Astudiaethau'r Testament Newydd yng Ngholeg y Bedyddwyr a Choleg y Brifysgol, Bangor. Cafodd ei ddirchafu'n Brifathro Coleg y Bedyddwyr yn 1943. Nid ymddeolodd tan 1959 pryd oedd eisoes yn 71 oed, a'r adeg honno dychwelodd i fyw i Gaerdydd, gan fudo yn ddiweddarach i fyw yn Windsor gerllaw David, ei fab ieuengaf.

Fel pregethwr, yn bennaf, y cofir am John Williams Hughes, a'r arddull dawel, sgwrsiol a orfodwyd arno gan ei afiechyd. Cafodd ei wahodd i bregethu mewn amryw o gyfarfodydd pwysig megis oedfa ffarwelio â chenhadon y Bedyddwyr yn Bloomsbury yn 1938, oedfa genhadol cyrddau blynyddol Undeb Bedyddwyr Lloegr yn Westminster Chapel yn 1946, a chyfarfod y Baptist World Alliance yn yr Albert Hall yn Llundain. Yn ystod ei oes faith daeth lluo o anrhydeddau eraill i'w ran. Bu'n Ddeon y Gyfadran Ddiwinyddol ym Mangor ac yn Ddeon Cyfadran Ddiwinyddol y Brifysgol, ac yn eu tro yn Llywydd Cymanfa Arfon, Eglwysî Rhyddion Gogledd Cymru ac Undeb Bedyddwyr Cymru. Gwasanaethodd ar amryw o bwyllgorau, gan gynnwys prif bwyllgor y Baptist Missionary Society a Central Religious Advisory Committee y B.B.C. yng Nghymru. Cyhoeddodd lu o ysgrifau mewn amryw o gylchgronau crefyddol a seciwlar (megis *Llafar*) a chyfrannodd erthyglau i'r *Geiriadur Beiblaid* a gyhoeddwyd yn 1926 a'r *Bywgraffiadur Cymreig hyd 1940* (1953). Golygodd *Cofiant Charles Davies* (1933). Cafodd ieuentid ysgolion Sul Cymru ddwy gyfrol fechan ganddo: *Hanes y Proffwydi* (1923) a *Hanesion Llyfr yr Actau* (1925). Yn 1949 paratôdd esboniad gwahanol i'r arfer i oedolion. Yn ei *Rhagair i Esboniad ar yr Epistolau at yr Effesiaid a'r Philipiaid* dadleua mai fel llythrau i'w darllen a'u deall ar un eisteddiad y bwriadwyd y ddau epistol, ac nid rhywbeth i'w darllen a'u dadansoddi linell wrth linell gan graffu ar bob gair a brawddeg. Rhaid darllen y llythyr drwyddo i ganfod beth y mae Paul yn ceisio'i ddweud, meddai. Aralleiriad o'r ddau lythyr, felly, a gyhoeddwyd ganddo gan gynnwys o fewn i'r aralleiriad unrhyw eglurhad y teimla sy'n angenrheidiol. Ar ddiwedd pob aralleiriad cynhwyswyd nodiadau ar ddetholiad cymharol fach o eiriau ac ymadroddion trawiadol. Ysgrifennodd hefyd gofiant byr yn 1946 i **Timothy Richard**, cyfaill ysgol i'w fam, ac yn 1962 cyhoeddodd ei unig gyfrol Saesneg, sef cofiant i genhadwr arall, **Christy Davies** - a *Brief Memoir*.

Rhwng Rhagfyr 1974 a Ionawr 1977 ymddangosodd ei hunangofiant yn ysgrifau wythnosol yn *Seren Cymru*, ond yn 1978, ac yntau eisoes yn ddeg a phedwar ugain oed, cyhoeddodd Gwasg Gomer yr ysgrifau mewn cyfrol yn dwyn y teitl *Troeon yr Yrfa*.

Bu farw yn sydyn ar 2 Hydref 1979 pan oedd ar ymweliad â'i fab Edward yng Nghernyw. Bu'r arwyl yn amlogfa Truro.

Awdur

D. Hugh Matthews, (1936 - 2020)

Ffynonellau

Dyddiadur a Llawlyfr Undeb Bedyddwyr Cymru (1980)

J. Williams Hughes, *Troeon yr Yrfa*

Seren Cymru 25 Awst 1972, 27 Medi 1974

Ceir darlun ohono ar siaced lwch Troeon yr Yrfa

Darllen Pellach

Undeb Bedyddwyr Cymru: Hughes – John Williams (1888-1979)

Dolenni Ychwanegol

Wikidata: Q20804733

Dyddiad cyhoeddi: 2010-01-29

Hawlfraint Erthygl: <http://rightsstatements.org/page/InC/1.0/>

PDF Argraffu Cyfeirnod

Mae'r Bywgraffiadur Cymreig yn cael ei ddarparu gan Lyfrgell Genedlaethol Cymru a Chanolfan Uwchefrydiau Cymreig a Cheltaidd Prifysgol Cymru. Mae ar gael am ddim ac nid yw'n derbyn cymorth grant. Byddai cyfraniad ariannol yn ein helpu i gynnal a gwella'r wefan er mwyn i ni fedru parhau i gydnabod Cymry sydd wedi gwneud cyfraniad nodedig i fywyd yng Nghymru a thu hwnt.

Ewch i'n tudalen codi arian am ragor o wybodaeth.

Trannu

Arddull APA

x

Matthews, D. H., (2010). HUGHES, JOHN WILLIAMS (1888-1979), gweinidog (Bed.) a Phrifathro coleg. *Y Bywgraffiadur Cymreig*. Adferwyd 3 Hyd 2024, o <https://bywgraffiadur.cymru/article/c7-HUGH-WIL-1888>

Y Bywgraffiadur

Preifatrwydd a Chwcis
Hawlfraint
Y Prosiect
Cymorth
Cysylltu

LGC
NLW

LLYFRGELL
THE NATION



Yn ddiwyd gan
Llywodraeth Cymru
Sponsored by
Welsh Government